

L A G R I M A S

Sas penas de su mundu sunu tantas
e minores o mannas dan dolore;
Ognunu nde connoschet su sabore,
ognunu nd'hat proadu chissà cantas.

Su signale lu dada su piantu,
visibile chi siat o frenadu
e lu movet su coro angustiadu
cando b'est su motivu e b'est su tantu.

Su pizzinnu, ch'idimus allattende,
cominzat subitu a si lamentare
cando su latte l'enit a mancare,
e no hat mai pasu, pianghende.

Custu pizzinnu, poi, mannitteddu,
in piantu, si frigada sos ojos:
No s'ischit cantos sunu sos torojos
in cuss'edade sua, mischineddu!

Ecco in iscola lu faghen andare
accompagnadu cun bonos cunsizos;
e arrivin, a s'ora, sos fastizos,
cun piantu diffizil'a calmare.

Poi si nd'enit s'edad'e s'amore,
cun palpitos segretos e suspiros,
ma primm'e ider sos coros unidos
b'hat oras de piantu e de dolore.

Non l'hat mai sa femina indebadas
su donu ch'est pro issa su maridu,
ca daboì su tempus est cundidu
de piantu, cun lagrimas cuadas.

Cussas, chi sun versadas a s'accua,
sun abbondantes chi parene venas;
e non sun tottu ch'ischini sas penas
chi passat una mama in vida sua.

No pro niente custu nostru mundu
est un'adde de lagrimas giamadu,
si narat a motiv'e su peccadu
originale. Misteriu profundu

ch'in tutt'ue bi siat su piantu,
nott'e die cun tuncios a dogh'ora,
in sa domo serrada, o cando fora,
in su camin'o intr'e Campusantu.

LIBERADU DA-E MALE

Lontanu tantos annos so istadu
in sa terra jamada Continente:
unu mundu diciosu e attraente
pro sos divertmentos fentomadu.
Però su logu meu tantu amadu
in d'un'angul'e coro fit presente.
Una visit'a s'annu che faghia,
prommiss'antiga fatt'a mama mia.

Sa licenza fit meda disizada,
e' sos meses fin longos a passare;
ma daboì 'e tantu suspirare
beniat cudda notte sonniada
de fagher sa famosa traversada,
ninnadu da-e s'unda de su mare;
già pensende a su mese de reposu
cuntent'e lu passare in pagh'e gosu.

Tando sas dies fin de libertade
avvicinend'amigos e parentes,
istimados o puru indifferentes
da' tottu ischia calchi novidade.

E devo narrer, pro sa veridade,
chi zertas oras fini divertentes.
Oras bellas su sero passizende,
o cun mama, in domo, discurrende.

Ma cand'eniàt su momentu feu
de partire, a sa fine de Nadale,
sas lagrimas de mama fin segnale
de truncare sas oras de recreu:
-Ba' in bonora, fizu, fizu meu
e sempre liberadu da'e male...-
Custu fit su saludu ch'ogni tantu
mi poniat in coro su piantu.

Bene e male passesini sos annos,
girende logos pro poder campare;
in chilca sempre de mi nde torrare
pro mi nd'essire da-e sos ingannos,
pro calmare, a su nessi, sos affannos
chi solene sa vida angustiare.
Finzas chi nêsi adiu veramente
a sa terra jamada Continente.

MAI CUNTEMPOROS

Su poveru disizat d'esser riccu,
custu, poi, si cheret sempre sanu.
Chie trattat sa zappa chilcat piccu,
su pizzinnu si cheret anzianu;
e tottu si nd'ischidan su manzanu
de malumore pro calchi pinniccu.

Chi' est nanu si cherede gigante,
non bastat unu ticcu a su sididu;
sapiente si cheret s'ignorante,
e sempre attatu cuddu ch'est famidu.
A una non li bastat su maridu
e pro cussu si faghede s'amante.

S'omine si disizat in sa luna
(e cun su tempus b'hat a resessire).
Bi sun cuddos chi chilcana fortuna
in terra anzena, e andan'a patire;
e meda 'oltas 'enit a finire
ch'inoghe si nde torran, tott'in d'una.

B'est calecunu chi ciambada sessu:
ecco s'omine femina diventat,
tottu pro meritu de su progressu,
e' sa femina mancu si cuntentat.
"Cust'est calchi duttore chi s'appentat",
narat sa zent'in bidde, "cessu, cessu!"

A tottu paret sempre troppu dura
sa ch'in su mundu si jamada sorte.
A su ch'est in su lettu ed est in cura
su dolore li paret meda forte.
E forsis a daboi de sa morte
si disizat diversa sepoltura!

SU PASSADU M'EST PRESENTE